

PLANINARSKI SAVEZ FEDERACIJE BOSNE I HERCEGOVINE
ПЛАНИНАРСКИ САВЕЗ ФЕДЕРАЦИЈЕ БОСНЕ И ХЕРЦЕГОВИНЕ
MOUNTAINEERING ASSOCIATION OF FEDERATION OF BOSNIA AND HERZEGOVINA
Terezija bb – Centar ‘Skenderija’, 71000 Sarajevo, Bosna i Hercegovina
Tel: +387 (0) 33 55 56 86, fax: +387 (0) 33 5556 85, e-mail: psfbih1@gmail.com



PRAVILNIK O RADU
KOMISIJE ZA PLANINARSKU ORIJENTACIJU
PLANINARSKOG SAVEZA FEDERACIJE BOSNE I HERCEGOVINE

Broj:74-03/23

MART/OŽUJAK 2023.

Na osnovu člana 32. tačka (3) stav 1 Statuta Planinarskog saveza Federacije Bosne i Hercegovine broj: 140-03/22 od 19. 03. 2022. godine, Upravni odbor Planinarskog saveza FBiH na sjednici održanoj 04. 02. 2023. godine donosi:

PRAVILNIK O RADU KOMISIJE ZA PLANINARSKU ORIJENTACIJU PLANINARSKOG SAVEZA FEDERACIJE BOSNE I HERCEGOVINE

OPĆI DIO

Član 1.

Komisija za planinarsku orijentaciju
Planinarskog saveza Federacije Bosne i Hercegovine

Komisija za planinarsku orijentaciju Planinarskog saveza Federacije Bosne i Hercegovine (u daljem tekstu Komisija) je stručno tijelo Upravnog odbora PS FBiH (u daljem tekstu UO PS FBiH).

Komisija radi po Pravilniku o radu komisija Planinarskog saveza Federacije Bosne i Hercegovine broj 84-04/16 od 19.12.2015. godine i Pravilniku o organiziranju i izvještavanju edukacija i polaganja za stručna zvanja planinarskog saveza Federacije Bosne i Hercegovine broj: 53/06-17 od 07.05.2017. godine.

Komisija broji najmanje tri člana od kojih je jedan član predsjednik, jedan zamjenik predsjednika i jedan član.

Broj članova Komisije se po potrebi može povećavati, s tim što proširenje vrši UO PS FBiH.

Radom Komisije rukovodi predsjednik, a u njegovoj odsutnosti njegov zamjenik.

Član 2.

Ciljevi

Komisija za planinarsku orijentaciju brine se o:

- razvoju planinarske orijentacije i koordinira cjelokupnu aktivnost u oblasti planinarske orijentacije na području BiH u okviru planinarske organizacije,
- planiranju i organizaciji stručnih predavanja, edukacija i tečajeva za sticanje stručnih zvanja u oblasti planinarske orijentacije,
- planiranju i organizaciji stručnih predavanja, edukacija i tečajeva u planinarskim organizacijama članicama PS FBiH u smislu prenošenja općih znanja potrebnih za snalaženje u prirodi
- planiranju i organizaciji takmičenja u planinarskoj orijentaciji,
- komunikaciji i suradnji sa međunarodnim udruženjima, federacijama i unijama u oblasti planinarske orijentacije.

Iz navedenog proizilazi da ciljevi Komisije obuhvataju aktivnosti na širenju i razvijanju planinarske orijentacije u Bosni i Hercegovini kroz suradnju sa tijelima i stručnim službama u PS FBiH, suradnju sa međunarodnim udruženjima, federacijama i unijama u oblasti planinarske orijentacije, zatim kroz sve vidove edukacija i stručnih osposobljavanja u oblasti planinarske orijentacije, dodjeljivanje stručnih zvanja i organiziranje takmičenja u planinarskoj orijentaciji

Ostvarivanje ciljeva iz prethodnog stava ovog pravilnika Komisija provodi se kroz sljedeće aktivnosti:

- Vođenje evidencije o stručnom kadru;
- Organiziranje i realizacija edukacije i druge aktivnosti potrebne za sticanje stručnih zvanja;
- Organiziranje i realizacija ostalih vidova edukacije za sve članice PS FBiH (škole, kursevi, tečajevi, seminari i druge vidovi stručnog usavršavanja);
- Izrada svih programa školovanja u oblasti planinarske orijentacije;
- Organizacija ispita za kandidate koji su stekli uvjete za polaganje i sticanje zvanja u oblasti planinarske orijentacije, te druge aktivnosti u vezi sa sticanjem stručnih zvanja u oblasti planinarske orijentacije;
- Organizacija i realizacija takmičenja u planinarskoj orijentaciji;
- Sudjeluje u organizaciji edukativnih aktivnosti drugih Komisija;
- Sarađuje sa međunarodnim organizacijama u vezi sa planinarskom orijentacijom;
- Sarađuje sa drugim stručnim komisijama i službama u PS FBiH;
- I druge aktivnosti za koje se ukaže potreba, a u vezi su sa planinarskom orijentacijom.

Član 3. Znak-amblem

Komisija ima svoj znak.

Znak se sastoji od dva kruga i dvije četvorokrake zvijezde postavljene tako da je u prvom planu veća četvorokraka zvijezda čiji vrhovi pokazuju na slova: N, E, S i W (slova predstavljaju međunarodne oznake za osnovne geografske pravce: sjever, istok, jug i zapad); iza koje se nalazi druga – manja četvorokraka zvijezda čiji krakovi su postavljeni po simetrali uglova krakova veće zvijezde, a potom dva kruga sa stepenovanim rubovima od kojih je manji postavljen u središtu većeg.

Znak se koristi isključivo zajedno sa znakom Planinarskog saveza.

KADROVI I STRUČNA ZVANJA U PLANINARSKOJ ORIJENTACIJI PS FBiH

Član 4.

Komisija organizira edukaciju za kadrove i za sticanje stručnih zvanja prema ukazanoj potrebi.

Komisija je dužna organizirati seminar za školovanje kad procjeni da se prijavio dovoljan broj kandidata.

Komisija određuje sadržaj, voditelje, predavače i asistente na edukaciji.

Član 5. Ispitna komisija

Komisija podnosi UO PS FBiH zahtjev za formiranje Ispitne komisije za stručno zvanje najmanje mjesec dana prije polaganja.

Zahtjev se podnosi na obrascu K-UO_3.

Ispitna komisija mora imati najmanje tri instruktora od kojih su dva sa stručnim zvanjem instruktora planinarske orijentacije.

Predsjednik Ispitne komisije mora imati instruktorsko zvanje iz specijalnosti za koje kandidat polaže.

Ispitna komisija radi po programu školovanja koji donosi Komisija.

Član 6.

Posebne situacije

Pod posebnim situacijama se podrazumijevaju situacije kada se iz opravdanih razloga može angažirati samo 1 (jedan) ili nijedan instruktor orijentacije, a neodržavanje ispita bi moglo bitno uticati na razvoj planinarske orijentacije u PS FBiH ili dovesti do gašenja planinarske orijentacije kao specijalnosti zbog nedostatka stručnih kadrova sa stručnim zvanjima i samim tim nemogućnosti školovanja drugih kadrova.

U posebnim situacijama UO PS FBiH može dodijeliti stručno zvanje Instruktor planinarske orijentacije planinaru koji ispunjava većinu općih i posebnih uvjeta za sticanje tog stručnog zvanja na zahtjev Komisije za planinarsku orijentaciju.

Dodijeljena stručna zvanja i licenca imaju istu snagu i vrijednost kao i stručna zvanja i licenca stečena ispitom i nosilac dodijeljenog zvanja može vršiti aktivnosti iz opisa stručnog zvanja Instruktor planinarske orijentacije.

Član 7.

U planinarskoj orijentaciji postoje kadrovi i stručna zvanja.

Kadrovi u planinarskoj orijentaciji su:

1. takmičar u planinarskoj orijentaciji;
2. orijentacista;
3. trener planinarske orijentacije;
4. instruktor planinarske orijentacije.

Kadrovi mogu biti fizičke osobe koje ispunjavaju uvjete propisane ovim pravilnikom.

Stručna zvanja u planinarskoj orijentaciji su:

1. trener planinarske orijentacije;
2. instruktor planinarske orijentacije.

Pravo na dobivanje stručnih zvanja imaju fizičke osobe koje ispunjavaju uvjete propisane ovim pravilnikom.

Stručna zvanja u planinarskoj orijentaciji dodjeljuje UO PS FBiH na prijedlog Komisije.

Planinarska udruženja, gradski i kantonalni planinarski savezi ne mogu svojim članovima dodjeljivati stručna zvanja u oblasti planinarske orijentacije.

Lica koja nisu osposobljena i licencirana od strane PS FBiH u oblasti planinarske orijentacije ne smatraju se edukatorima i nisu ovlašteni za vršenje edukacije u toj oblasti.

UVJETI I NAČIN IMENOVANJA KADROVA, DOBIVANJE ZVANJA, TE PRAVA I OBAVEZE

Član 8.

Takmičar u planinarskoj orijentaciji

Takmičar u planinarskoj orijentaciji (u daljem tekstu: takmičar) je kadar u planinarskoj orijentaciji i može biti svaki član planinarskog udruženja koji ispunjava sljedeće uvjete:

- da je član Planinarskog saveza FBiH,
- da aktivno učestvuje u takmičenjima u planinarskoj orijentaciji koja se organiziraju i realiziraju od strane Komisije.

Takmičari se zavode u evidencije takmičara u planinarskoj orijentaciji PS FBiH za svaku godinu u kojoj se takmiče, a njihovo zvanje traje u toku takmičarske godine.

Takmičari nemaju stručno zvanje i ne dobijaju diplome.

Takmičari nemaju posebna prava i obaveze, a na takmičenjima učestvuju na dobrovoljnoj bazi.

Član 9. Orijentacista

Orijentacista u planinarskoj orijentaciji (u daljem tekstu: Orijentacista) je kadar planinarske orijentacije i predstavlja uvjet koji se mora ispuniti da bi se moglo pristupiti stručnom usavršavanju i sticanju zvanja Trener ili Instruktor planinarske orijentacije, a dobiva se automatski po završetku Osnovne škole orijentacije koja je organizirana i realizirana od strane Komisije.

Orijentacista je svaki član planinarskog udruženja koji ispunjava sljedeće uvjete:

- da je član Planinarskog saveza FBiH,
- da je uspješno završio osnovnu školu planinarske orijentacije prema programu školovanja Komisije.

Orijentacista nema stručno zvanje, ali dobija diplomu PS FBiH o završenoj Osnovnoj školi planinarske orijentacije na kojoj je naznačeno da se radi o Orijentacisti.

Orijentacisti nemaju posebna prava i obaveze.

Član 10. Trener planinarske orijentacije

Trener planinarske orijentacije (u daljem tekstu: Trener) je stručno zvanje koje dobivaju planinari radi edukacije i uvježbavanja takmičara u planinarskoj orijentaciji u svojim matičnim udruženjima.

Trener je svaki član planinarskog udruženja koji ispunjava sljedeće uvjete:

- da je državljanin Bosne i Hercegovine,
- da je član Planinarskog saveza FBiH,
- da ima najmanje 18 godina,
- da je uspješno završio osnovnu školu planinarske orijentacije prema programu školovanja Komisije ili je najmanje dvije godine imao zvanje Takmičar,
- da je uspješno završio tečaj za sticanje stručnog zvanja Trener planinarske orijentacije prema programu školovanja Komisije,
- Da je položio završni ispit.

Stručno zvanje je trajno

Da bi mogao vršiti edukaciju i uvježbavati takmičare, osim stručnog zvanja, Trener treba da posjeduje važeću licencu koju izdaje PS BiH na prijedlog Komisije, a ista ima ograničeno trajanje.

Licenca je dopuštenje, odnosno dozvola kojom PS FBiH ovlašćuje planinara sa stručnim zvanjem Trener da određeno vrijeme vrši edukaciju i uvježbavanje takmičara, odnosno prenosi osnovna znanja iz oblasti planinarske orijentacije planinarima članovima matičnih društava.

Prvu licencu dobiva Trener koji je završio pripravnički staž, tj. u roku od godinu dana od dobivanja stručnog zvanja Trener, sa najmanje jednom ekipom (kategorija nije bitna), učestvuje u planinarskom orijentacionom takmičenju PS FBiH koje organizira Komisija. Ova Licenca važi 2 (dvije) godine i u istoj je naveden datum isteka važnosti iste.

Po isteku važnosti Licence, Trener treba da produži njenu važnost ukoliko ispunjava uvjete za to, odnosno ukoliko u toku 2 (dvije) godine na planinarskom orijentacionom takmičenju učestvuje najmanje jedne godine sa najmanje jednom ekipom.

Zahtjev Trenera koji ne ispunjava uvjete za produženje Licence, odbacuje se dok ne ispuni uvjete.

Iznimno se Treneru može Licenca produžiti na 1 (jednu) godinu, iako ne ispunjava uvjete, ako Trener Komisiji podnese pismenu molbu u kojoj navodi opravdane razloge zbog kojih nije ispunio uvjete.

Molbu razmatra Komisija.

Trener može da se žali na odluku Komisije.

Žalbu Trener, u roku od 15 dana od dana zaprimanja odluke Komisije podnosi Upravnom odboru PS FBiH čija odluka je konačna.

Trener može izgubiti Licencu ukoliko:

- 2 (dva) puta uzastopno (period od 4 godine), ne produži licencu,
- prekrši odredbe Pravilnika Komisije za planinarsku orijentaciju
- zloupotrijebi stečena prava,
- ne prisustvuje seminaru za usavršavanje najmanje jednom u toku 2 godine,
- neopravdano odbije da vrši edukacije koje organizira Komisija,
- ne obavi potrebne formalnosti.

Ukoliko izgubi Licencu, za sticanje druge Trener mora poduzeti sve aktivnosti koje je morao prilikom sticanja prve Licence, što podrazumijeva i ponovno pohađanje tečaja i polaganje ispita, te pripravnički staž.

Prava i obaveze/dužnosti Trenera

Trener ima prava:

- da uživa sva prava i pogodnosti koja su navedena u Pravilniku i Statutu PS FBiH,
- da izvodi edukaciju i uvježbavanje takmičara;
- da učestvuje na edukacijama u svojstvu asistenta ukoliko mu isto pravo nije osporeno na prijedlog Komisije;
- da ima pravo na napredovanje i registraciju, ako je ispunio uvjete koji su navedeni u ovom Pravilniku,

- na troškove, koji nastaju u vezi sa organizacijom i realizacijom aktivnosti koje organizira PS FBiH (troškovi prijevoza, smještaja, ishrane tokom tih aktivnosti, te materijalni troškovi, ukoliko su nastali tokom aktivnosti koje je organizirala Komisija,
- informiranost o aktivnostima koja su vezane za Trenere,
- da sudjeluje u pripremi edukacije ili takmičenja ako se ukaže potreba za njegovim angažmanom;
- da uživa i druga prava ugovorena posebnim aktima.

Trener ima dužnosti/obaveze da:

- sudjeluje u svim aktivnostima PS FBiH,
- se brine o pravilima i programima za stručno usavršavanje,
- na edukaciji ili uvježbavanju posjeduje potrebnu opremu,
- aktivno sudjeluje u svim aktivnostima koje su vezane za planinarsku orijentaciju, a koje organizira Komisija,
- svake 2 (dvije) godine obnavlja svoje znanje Trenera kroz edukaciju;
- redovno obnavlja svoju registraciju/licencu,
- doprinosi učlanjenju novih članova u planinarska udruženja PS FBiH,
- svojim djelovanjem učestvuje u širenju programa svojih matičnih udruženja,
- pomaže u obrazovanju novih Trenera kroz asistiranje na svim vidovima edukacija i stručnih usavršavanja ukoliko se za tim ukaže potreba,
- čuva kulturno-historijska dobra,
- čuva okoliš i prirodu,
- djeluje u skladu sa Pravilnikom Komisije za planinarsku orijentaciju, Statutom PS FBiH i kodeksom ponašanja u okvirima planinarenja.

Član 11.

Instruktor planinarske orijentacije

Instruktor planinarske orijentacije (u daljem tekstu „Instruktor“) je stručno zvanje koje dobivaju planinari radi edukacije i svih drugih aktivnosti koje se realiziraju radi sticanja znanja iz oblasti planinarske orijentacije, te sticanja stručnih zvanja PS FBiH u planinarskoj orijentaciji.

Instruktor je svaki član planinarskog udruženja koji ispunjava sljedeće uvjete:

- da je državljanin Bosne i Hercegovine,
- da je član Planinarskog saveza FBiH,
- da ima navršenu 21 godina života,
- da je u stručnom zvanju Trener proveo aktivno najmanje 3 godine, što podrazumijeva da je najmanje jednom produžio važnost licence u zvanju Trener;
- da je aktivno učestvovao u najmanje tri škole planinarske orijentacije u organizaciji Komisije, kao kandidat za instruktora planinarske orijentacije, i učestvovao u radu tečaja kao demonstrator i teoretski predavač;
- da ima pisanu preporuku instruktora, vođe tečaja sa kojim je izvodio obuku;
- da je aktivno učestvovao u organizaciji najmanje pet takmičenja u orijentaciji;
- da je pratio novine koje se donose vezano za orijentacijska takmičenja te da u tri godine, pred polaganje prisustvuje jednom (1) seminaru u organizaciji Komisije, uz obavezno prenošenje znanja;
- da ima sposobnost prenošenja znanja;
- da je položio teorijski i praktični ispit koji je organizovala ispitna komisija po programu odobrenom od strane Komisije za orijentaciju.

Stručno zvanje je trajno.

Da bi mogao obavljati djelatnosti u opisu zvanja, Instruktor treba da posjeduje važeću licencu koju izdaje PS BiH na prijedlog Komisije.

Licenca je dopuštenje, odnosno dozvola kojom PS FBiH ovlašćuje planinara sa stručnim zvanjem Instruktor da vrši djelatnosti iz opisa stručnog zvanja.

Posebni uvjeti za stjecanje licence za rad instruktora orijentacije su:

1. da je član Planinarskog saveza FBiH;
2. da je, u zadnje dvije godine, aktivno učestvovao u radu matičnog kluba u praktičnom osposobljavanju orijentacista i takmičara tokom izvođenja orijentacijskih treninga, kao i da je prisustvovao i aktivno učestvovao u treninzima kao instruktor orijentacije;
3. da je u zadnje dvije godine aktivno uključen u organizaciju rada matičnog kluba, kao i da je prisustvovao na sastancima matičnog kluba u nekom obliku;
4. da je u zadnje dvije godine aktivno učestvovao u radu Komisije za orijentaciju kroz predavanja i prenošenje znanja na tečajevima i seminarima u organizaciji Komisije za orijentaciju ili ispitnim komisijama u organizaciji Komisije za orijentaciju, kao i da je prisustvovao na najmanje jednom tečaju i u jednoj ispitnoj komisiji;
5. da se u zadnje dvije godine stručno usavršavao, kao i da je prisustvovao na najmanje jednom stručnom seminaru u organizaciji Komisije za orijentaciju, ili međunarodnim stručnim seminarima iz svoje specijalnosti, kao i da je prisustvovao u organizaciji na najmanje dva takmičenja u orijentaciji;
6. da je platio kotizaciju za izdavanje iskaznice licence;
7. da je predao svu potrebnu dokumentaciju Komisiji uz zahtjev za izdavanje licence u propisanim rokovima.

Licenca Instruktor je trajna, s tim da je može izgubiti.

Instruktor može izgubiti Licencu ukoliko:

- prekrši odredbe Pravilnika Komisije za planinarsku orijentaciju
- zloupotrijebi stečena prava,
- ne prisustvuje seminaru za usavršavanje najmanje jednom u toku 2 godine,
- neopravdano odbije da vrši edukacije koje organizira Komisija,
- ne obavi potrebne formalnosti.

Ukoliko izgubi Licencu, za sticanje druge Instruktor mora ispuniti posebne uvjete za sticanje Licence.

Prava i obaveze/dužnosti Instruktor

Instruktor ima prava :

- da uživa sva prava i pogodnosti koja su navedena u Pravilniku, Statutu PS FBiH i drugim aktima u članicama PS FBiH,
- da izvodi edukaciju u organizaciji Komisije ili planinarskih udruženja uz odobrenje Komisije;
- na troškove, koji nastaju u vezi sa organizacijom i realizacijom aktivnosti koje organizira PS FBiH (troškovi prijevoza, smještaja, ishrane tokom tih aktivnosti, te materijalni troškovi, ukoliko su nastali tokom aktivnosti koje je organizirala Komisija),
- na informiranost o aktivnostima koja su vezane za Instruktor i Trenere,
- da sudjeluje u pripremi edukacije ili takmičenja ako se ukaže potreba za njegovim angažmanom;
- da Komisiji predlaže asistente na edukacijama i da ocjenjuje njihov rad;
- uživati i druga prava ugovorena posebnim aktima.

Instruktor ima dužnosti/obaveze da:

- sudjeluje u svim aktivnostima PS FBiH koje su na bilo koji način vezane za planinarsku orijentaciju,
- aktivno sudjeluje u svim aktivnostima koje su vezane za planinarsku orijentaciju, a koje organizira Komisija,
- se brine o pravilima i programima za stručno usavršavanje,
- na edukaciji ili uvježbavanju posjeduje potrebnu opremu,
- kao član ispitne komisije prisustvuje ispitima za stručna zvanja i aktivno odlučuje o sticanju stručnih zvanja ,
- doprinosi učlanjenju novih članova u planinarska udruženja PS FBiH,
- svojim djelovanjem učestvuje u širenju programa svojih matičnih udruženja,
- pomaže u obrazovanju novih Trenera kroz pozivanje na asistiranje na svim vidovima edukacija i stručnih usavršavanja ukoliko se za tim ukaže potreba,
- čuva kulturno-historijska dobra,
- čuva okoliš i prirodu,
- djeluje u skladu sa Pravilnikom Komisije za planinarsku orijentaciju, Statutom PS FBiH i kodeksom ponašanja u okvirima planinarenja.

REGISTRACIJA KADROVA, STRUČNIH ZVANJA I LICENCI ZA RAD

Član 12.

Svi planinari koji postanu kadrovi planinarske orijentacije i steknu određeno stručno zvanje upisuju se u registar kadrova i stručnih zvanja planinarske orijentacije PS FBiH, kojeg vodi Komisija.

Po isteku pripravničkog staža, ukoliko se zadovolje traženi uvjeti, i nakon podnošenja zahtjeva za izdavanje licence, dobiva se prva dozvola ili licenca za period od 2 (dvije) godine.

Po dobivanju licence, nosilac se upisuje u registar izdanih licenci.

Registar kadrova i stručnih zvanja i registar licenci, te poslove oko registracije kadrova, stručnih zvanja i licenci vodi Komisija u suradnji sa Kancelarijom PS FBiH.

Diplome za kadrove i stečena stručna zvanja, kao i licence za rad stručnih kadrova odobrava UO PS FBiH na prijedlog Komisije, a o izradi i dostavi se stara Kancelarija PS FBiH.

Registracija obuhvata lične podatke, podatke o osposobljavanju, te vrsti kadrova ili stručnih zvanja.

Kancelarija PS FBiH može koristiti podatke u skladu sa zakonskim propisima.

Član 13.

Žalba

Planinari koji su stekli stručna zvanja, imaju pravo žalbe na sve odluke Komisije koje se tiču samo njihovog statusa i statusa njihovih stručnih zvanja.

Žalba se podnosi Komisiji pismenim putem (poštom ili e-mailom) u roku od 15 dana od dostavljene ili objavljene odluke Komisije.

O žalbi odlučuje UO PS FBiH u roku od 3 (tri) mjeseca.

U slučajevima kada je potrebno prikupljanje činjenica koje mogu bitno uticati na odluku UO PS FBiH o konkretnoj stvari, tada se rok produžuje za najviše 3 (tri) mjeseca, što ukupno traje najviše 6 mjeseci.

ZBOR KADROVA I NOSILACA STRUČNIH ZVANJA U PLANINARSKOJ ORIJENTACIJI

Član 14.

Zbor kadrova i nosilaca stručnih zvanja u planinarskoj orijentaciji (u daljnjem tekstu: Zbor) je skup svih kadrova i nosilaca stručnih zvanja u planinarskoj orijentaciji na kojem se donose primjedbe i sugestije za dalji rad Komisije u cilju razvoja planinarske orijentacije.

Komisija saziva Zbor prema potrebi, a najmanje jednom u četiri godine.

Zborom predsjedava predsjednik Komisije, a u njegovoj odsutnosti zamjenik, a u njihovoj odsutnosti opunomoćeni član Komisije, a u njihovoj odsutnosti prisutni članovi Komisije među sobom biraju predsjedavajućeg člana.

Zbor odlučuje natpolovičnom većinom glasova. Pravo glasa pri odlučivanju na Zboru imaju samo sudionici zbora sa zvanjem trener i instruktor orijentacije.

Zapisnik i izvještaj o održanom zboru sačinjava planinar koji je predsjedavao Zborom, a dostavlja se UO PS FBiH putem Kancelarije PS FBiH

POSEBNE ODREDBE

Član 15.

Kadrovi i nosioci stručnih zvanja u planinarskoj orijentaciji su za svoj rad odgovorni po statutu PS FBiH, Kodeksu časti i ponašanja planinara i ostalim aktima, koji su doneseni u PS FBiH.

Kadar i nosilac stručnog zvanja u planinarskoj orijentaciji zbog kršenja i/ili nepoštivanja Statuta PS FBiH, ovog Pravilnika, ostalih akata PS FBiH ili Kodeksa časti i ponašanja planinara, može biti obrisani iz registra kadrova, stručnih zvanja i izdanih licenci.

Brisanje se vrši odlukom Upravnog odbora PS FBiH na osnovu dokumentovanog prijestupa ili kršenja.

Prijedlog za brisanje podnosi Komisija, na osnovu prijedloga koje zaprimi u roku od 3 (tri) mjeseca od kršenja i/ili nepoštivanja gore navedenih akata PS FBiH. Prijedlog Komisiji mogu podnijeti pojedinci ili planinarska udruženja.

Član 16.

Za tumačenje ovog pravilnika nadležna je Komisija i UO PS FBiH.

Član 17.

Ovaj Pravilnik stupa na snagu danom donošenja i objavljivanja.

Predsjednik PS FBiH

Rasim Radonja